

ADOLPHI MEKERCHI  
BRUGENSIS I.C.

ΠΑΡΩΔΙΑ ΕΚΑΤΟΣΤΙΧΟΣ,

FRONTISPICII

EXPLICATIO.

**I**MMENSAM Terræ molem, vastique meatus  
Oceani, toto sparsas & in æquore terras,  
Scriptorum multi veterum multiq̄ue recentum  
Ingenio præstanti & rerum divite censu  
Hactenus aggressi, triplices tantummodo partes  
Invenère Orbis, quas nec describere plene  
Posse datum est. Nostro id longè felicius ævo  
Præstitit ORTELIVS multâ majoribus ausis:  
ORTELIVS, quem quadrijugo super æera curru  
Phæbus Apollo vehi secum dedit, unde jacentes  
Lustraret terras circumfusumq̄ue profundum.  
Hinc olli Phæbum, qui conspicit omnia, prorsus  
Ignotas, alio penitus penitusq̄ue sub Orbis  
Axe sitas monstraße plagas, solisque relectas  
Indigenis, Orbemque novum, gentèsque, virósque  
Detexisse ferunt, mundi que arcana remoti.  
Ille igitur, studiis quò consulat, hocce THEATRVM  
ORBIS TERRARVM toti communicat Orbi.  
In quo non veterum errores, incertave tradit  
Somnia, sed tripode ex ipso certissima visa.  
Quoque magis mirère, tribus superaddidit Orbis  
Partibus hic binas alias, quas nemo priorum  
Vel fando audierat. Frontem solum adspice libri,  
Invenies etiam quod te pictura docebit.  
Arce sedet summa solio Regina superbo  
EVROPE, cujus viridis fastigia lambit  
Pampinus, & dulci vitis fecunda racemo.  
(Nam colit Europe Bacchum, Bacchus colit illam.)  
Dextra manus sceptrum gestat, clavumque sinistra  
Admotum sphaeræ, caput est insigne corona.  
Hæc reliquis Nymphis excelsior omnibus una est,

QUINQUE  
ORBIS PAR  
TES.

EVROPA.

Et latè, auspiciis quondam victricibus armis  
Roma tuis, fines porrexit adusque calentem  
In Libyam, inque Asiam, divisosque orbe Britannos.  
Ejus & imperium proferre Hispania nuper  
Ausu, per ignotum pelagus nova regna, novosque  
Invenit populos, qui nunc NOVUS ORBIS habetur.

ASIA.

Adspicis à dextris ASIAM, quæ splendida Eois  
Tota nitet gemmis, tota est ornata lapillis.  
Hæc manibus plenam turis beneolentis acerram  
Ostentat, myrrham redolens, Stactenque suavem,  
Et gummi croceum, pigmenta, & aromata, & omnes  
Assyrios fucos, Arabum prædita dona.

AFRICA.

AFRICA parte alia est fervore notabilis ipso  
Æthiopsia, perinsano Phaëthonte perusta  
Infrenos dum Solis equos currumque fatigat  
Ignarus juvenis, nec flectere novit habenas,  
Ac terra propius candentem deprimit axem:  
Demens qui tantos animo conceperit ausus.  
Hinc habet illa caput radijs cinctum omne coruscis,  
Membraque perpetuum propter nudata calorem.  
At quia odorato sudantia Balsama ligno  
Ægyptus propriè sibi vendicat, hæc quoque Virgo  
Balsameum dextra ramum prætendit olentem.

AMERICA.

Inferiore solo quam cernis AMERICA dicta est:  
Quam nuper vectus pelago Vespucius audax  
Vi rapuit, tenero nympham complexus amore.  
Illa oblita sui, castique oblita pudoris  
Nuda sedet totum corpus, nisi vitta capillos  
Plumea vinciret, frontem nisi gemma notaret,  
Ambirent teretes nisi tintinnabula suras.  
Lignea clava olli in dextra: qua mactat obesos  
Atque saginatos homines, captivæque bello  
Corpora, quæ discissa in frusta trementia lentis  
Vel torret flammis, calido vel lixat abeno.  
Vel, si quando famis rabies stimulat mage, cruda  
Et jam cæsa recens, nigroque fluentia tabo

*Membra vorat, tepidi pavitant sub dentibus artus,  
Carnibus & miserorum & sanguine vescitur atro:  
Horrendum facinus visu, horrendumque relatu.  
Quid non impietas designat barbara? quid non  
Contemptus Superum?*

*Adspicis in læva fœdatum cæde recenti  
Humanum caput. En arcum celeresque sagittas,  
Queis solet, adducto dum flectit cornua nervo,  
Vulnera certa viris certamque infligere mortem.*

*Mox defessa hominum venatu tradere somno  
Membra volens, lectum contextum rariùs instar  
Reticuli, gemino à palo quem fixit utrimque,  
Conscendit, textoque caput reclinat & artus.*

MAGELLA  
NICA.

*Haud procul hinc nitidum caput exserit ultima Nymphe  
Virginis os vultumque gerens, pectusque venustum:  
Trunca manus & trunca pedes, vix cognita paucis.  
Hujus amore aiunt Magellum nuper Iberum  
Exarsisse, freto dum se commisit ad Austrum,  
Et vocitasse suo de nomine MAGELLANAM.  
Ille etenim tum fortè, micantibus undique flammis,  
Incautam semel adspexit, sollempnia festa  
Dum parat: Hinc Virgo multo suffusa rubore  
Extemplo caput occuluit, furvòque seipsam  
Involvit fumo & fusca caliginis umbris.*

*At, ne fors iterum temere sese illa videndam  
Præbeat, hanc fixit memorem sub pectore flammam.*

*Audisti quid prima foris tibi pagina monstret  
Spectator. ne siste oculos hic; inspice porrò,  
Atque Orbem brevibus vastum metire tabellis.  
Sic poteris tutò regiones ire per omnes,  
Ignotasque inter longinqua per oppida gentes,  
Fluminaque, & montes, valles, maria omnia circum,  
Ac peragrarè vagi quidquid capit orbita mundi.*

